

Pa mundial 2010 bo no mester ta clarividente

Ayera tabata un dia cu mi a ricibi hopi yamada di esnan cu a goza (segun algun a gañami) di e comentario riba mundial.

Mi tabata sa cu e lo pone hende hari (mi) pa motibo di e eroneo cu mi tabata den mi pronosticacion prome cu mundial, sinembargo mi a keda contento cu casi tur hende a mira e humor den e comentario y a disfruta lesando.

Awe si mi kier ta mas serio, usando mi apodo di "**Jubystradamus**" pa muestra cu bo no mester di ta un clarividente pa sa con Mundial di Futbol 2010 lo desaroya na Zuid Africa.

Ayera mi wega di palabra y frasenan tabata cu e tecnico di Inglatera y awe lo mi usa esun di Hulanda.

Mi ta fanatico di Hulanda, di Brasil, di Argentina, di Portugal, di Costa Rica di Trinidad solamente dependiendo di e wega cu ta ser hunga.

Dia cu mundial wordo hunga na Aruba lo mi ta "**tur afo pa Aruba**".

BAFANA BAFANA

Mi ta supone cu tur hende ta corda ainda e seleccion di "**Bafana Bafana**", wel ta e seleccion aki a habri campeonato mundial 2010 contra Hulanda. Seleccion **Bafana Bafana** dirigi pa **Jomo Sono** a gana Hulanda 7-3 pa duna mas realce africano na **Copa Mundial 2010**. (cuater aña pasa, ki mishi Alemania perde prome wega?)

Jomo Sono a bira tecnico di **Bafana Bafana** un luna prome cu campeonato mundial 2010, reemplasando coach **Marco van Basten**, cu a reemplaza e italiano **Marcello Lippi** cu na su turno a reemplaza **Dick Advocaat** cu a tuma lugar di ex entrenador di Australia y Russia, **Guus Hiddink** cu a reemplaza **Sono** cu a reemplaza ex tecnico di Brasil, **Carlos Alberto Pereira**, cu a join seleccion nacional despues di campeonato mundial 2006 mientras cu **Asociacion di Futbol di Zuid Africa** freneticamente tabata busca estabilidad na forma un equipo campeon pa e torneo na cas.

ACOMODACIONNAN

Jomo Sono su seleccion di 23 hungador tabata inclui 19 hungador di e equipo "**Jomo Cosmos**" cu nan goleador **Akwa Baloo** di 51 aña di edad, como un di e hungadornan cu no ta forma parti di Cosmos.

Sono tabata tin dificultad pa acomoda su equipo tecnico den e area di equipo, ya cu tabata trata di 91 persona pa sinta hunto cu e hungadornan riba banki.

Na Zuid Africa ta soluciona tur cos, pues a percura pa asientonan temporario.

E otro problema di inauguracion di campeonato tabata cu e compania "**Crocodile Tickening**" accidentalmente a bende 260.000 carchi pa e wega inaugural na Ciudad di Cabo.

Despues di un tardanza di 4 ora e wega porfin a cuminsa, locual ta masha normal tur caminda cu no ta Europa, Merca, Canada of Australia.

Nos conoce toch "**e ora di Aruba**". Zuid Africa tambe conoce "**di nan**".

PROME 45 MINUUT

E prome 45 minuutnan di wega a tuma lugar den "**Green Cape Stadium**" cu ta un stadion nobo cu a cuminsa wordo construi na 2009 y pa bini cla na 2015 y e di dos 45 minuutnan a ser hunga den "**Wini Stadium**", resultado di un compromiso

soluciona despues di un disputa gubernamental.

Hulanda a cuminsa domina y bay dilanti cu goal di **Johan Frieske** di 14 aña di edad sigui pa goal di e bieu "**Reiziger**" laga afo na 2006 debi na artritis na cabez, prome cu e hungadornan di **Togo** cu a drenta huelga a subi tereno.

E wega a wordo interumpi pa un rato, net 50 minuut.

Den continuacion, **Bafana** a logra anota su prome goal net algo prome cu **Hulanda** a anota su di tres pa medio di e veterano "**Roy**" cu tampoco a forma parti di seleccion di 2006 debi na problemaman di "**presion halto**". El a cunsumi hopi pa varios aña mirando cu el a ser laga afo.

E wega a para atrobe pa 15 minuut despues cu a saca **Gullit** for di wega, debi cu el a rabia pa un tackle, saca su dientenan falso y tira esakinan den cara di delantero "**Mbane Gusma**".

Tur dos hungador a wordo retira di tereno carga den tapijt traidicional sur-africano.

Un rato despues a pita pa halftime, y tur hungador a wordo hinca den "**Taxi minibus**" oficial di campeonato mundial 2010 y transporta di **Green Cape Stadium** pa **Wini Stadium**.

E hungadornan africano a yega yen di brio y comfortable na stadion, mientras cu e hulandesnan a aparece bleek y zonga. E viahe normal di 25 minuut a ser haci den 8 minuut pasando den direccion contrario di trafico pa yega mas tempran pa continuacion di e wega segun ora exige pa televisionnan. Tur 23 hungador hulandes tabata primi riba otro den e minibus pa eficiencia.

DI DOS 45 MINUUT

Comienzo di e di dos mitar di wega a tarda poco ya cu e huesped di honor, **Ronaldo**, ex astro di seleccion di **Brasil**, portador di record di anotacion den historia di mundial, a keda pega den tunnel bao di stadion, cu ta conduci pa tereno. Den 4 aña el a subi te 300 liber di peso. Despues cu bomberonan local a logra sake for di tunnel pa e ricibi su plakaat honorario, e wega por a sigui. El a keda expresa su "**brigado**" pa wordo bisa keto bay cu no ta "**brigado**" pero "**brigada**" di bomberonan a rescate.

E tardanza a pone cu smaak di hungadornan hulandes a cay un poco y no a dura mucho cu **Bafana Bafana** tabata ariba 6-3. E di 7 goal di **Bafana Bafana** a ser anota pa **Sono** mes cu a drenta den ultimo 10 minuut como hungador seyando e victoria pa **Zuid Africa** den wega inaugural. (Alemania tambe a gana wega inaugural na **Alemania 2006**)

DESPUES DI WEGA

"*E recorrido den taxi minibus tabata un pesadiya*", Davids a laga sa despues di wega. "*Den di dos mitar di e partido e staf di seguridad y polisnan dunando servicio den stadion, a keda molestia nos hungadornan buscando autografo, pidiendo pa cigarra, y mendigando pa placa larga cada momento cu nos haya un corner of outbal*".

Jomo Sono mes a keda masha encanta cu resultado di e wega y a laga sa cu ya e ta cla pa e di dos encuentro cu lo ta contra **Nigeria** cu ta spera cu nan lo tin seis di nan astronnan for di prison riba fianza, despues di un incidente relaciona cu credit card falso cu nan a usa via Internet pa saca placa di hende, hasta for di Aruba unda algun hende a cay den nan trampa di ofertanan miyonario.

Despues di tempo lo mi duna informe riba horario di e weganen for di **Zuid Africa**. Keda pendiente.

Juby Naar.

MOURIK CARIBBEAN N.V.

TIN MESTER DI MINI-EXCAVATOR, SAFETY-MAN/VROUW, EXPEDITORS Y WASTE CO-ORDINATORS, Y CU TIN RIJBEWIJS B/E, PREFERIBEL CU ARUBA SAFETY COUNCIL TRAINING PA E PERIODO DI TURNAROUND. MESTER TA HULANDES OF TIN PERMISO PATRAHA.

POR YAMAPA UN CITANA CELULAR # 5942136,
MR JIM HIGGINS
LAGOWEG # 36
SAN NICOLAS.

TELEFONNAN

DI DIARIO

582-6747

FAX

582-8551

Angel Skin Gare Center

BO KE BAHA 10 KILO DEN SEIS SIMAN GARANTIZA
Faciale, Maquillaje permanent, wax
y mucho mas

nos tin tur producto di:
GERMAINE DE CAPUCCINI

Tel: 588-2377 / 964-9988 / 745-0910
Katunastraat 25 - Ponton